

05/04/1997

5,000 sambut Mahathir di Kelantan

KOTA BHARU, Jumaat - Perdana Menteri, Datuk Seri Dr Mahathir Mohamad, diberi sambutan meriah oleh kira-kira 5,000 orang dari segenap lapisan rakyat, setibanya di Lapangan Terbang Sultan Ismail Petra, Pengkalan Chepa, dekat sini, pagi ini untuk lawatan kerja sehari.

Beliau yang diiringi isterinya, Datin Seri Dr Siti Hasmah Mohd Ali, disambut Menteri Besar Kelantan, Datuk Nik Aziz Nik Mat, sebaik saja pesawat khas yang membawa mereka mendarat di lapangan terbang itu pada kira-kira jam 9 pagi.

Turut menyambut beliau Menteri Pembangunan Luar Bandar, Datuk Annuar Musa, yang juga Pengerusi Barisan Nasional (BN); Menteri Pembangunan Usahawan, Datuk Mustapa Mohamed dan Pengerusi Koperasi Usaha Bersatu Berhad (KUB), Datuk Hassan Harun.

Doa selamat dibacakan sebagai tanda kesyukuran lawatan Perdana Menteri ke negeri ini dan kejayaannya menerima Anugerah al-Malik Faisal, di Riyadh Arab Saudi, baru-baru ini.

Doa itu dibaca oleh pegawai agama di Jabatan Pembangunan Persekutuan (JPP), Ibrahim Harun.

Sebelum berlepas dari lapangan terbang itu untuk majlis rasmi pertama di Pengkalan Chepa, Perdana Menteri menerima empat cenderamata disampaikan oleh beberapa pemimpin mewakili rakyat Kelantan.

(END)